

Forum cultural Tujetsch ha presentau il project nums locals

Dacuort ha il Forum cultural da Tujetsch presentau alla populaziun ed ad auters interessents il project dils nums locals da sia vischnaunca. Cun il Forum cultural posseda la vischnaunca da Tujetsch ina zun impurtanta uniuon che sesprova cun bia engaschi e plascher da mantener la cultura en ils uclauns ed en la valla-da. Dapi entgin temps han ils premurai vischins Bruno Berther e Tumaisch Valier recaltgau e registrau digital varga 1500 nums locals dalla vischnaunca da Tujetsch.

Il biro d'inschignier Cavigelli da Glion ha mess a disposiziun la documentaziun dallas parcellas dalla mesiraziun ufficiala. Cun l'applicaziun da Google Earth eis ei stau pusseivel da

presentar als presents visualmein in stupent e beincapeivel project. Grazia al pli niev sistem electronic eis ei reussiu da francar mintga num local ord tuts encardens dil territori dalla vischnaunca da Tujetsch. Cun quellas apparatusas san ins secapescha era far midadas ni amplificaziuns tenor bagesns. Ins sa encurir ils nums locals dil territori gaviischau detagliadamein. Il monitur porta ils maletgs respectiv il territori cun ils nums locals gaviischai sco ina carta illustrada, ina grondiusa caussa.

Duront la presentaziun dil project hael jeu era patertgau vid pader Ambros Widmer d.p.m dalla claustra da Mustér: El ha rimnau cun paucs gidonters duront biars onns pruamein ro-

dund 3500 nums locals e funsils dalla vischnaunca da Mustér. El havess segir giu grond plascher digl engaschi dils Tuatschins e dil magnific project che vus haveis francau per la cultura da vossa vischnaunca.

Cumpliment e gratulaziun oravontut als iniziants Bruno Berther e Tumaisch Valier sco era a tuts quelli che han gidau vid quei project singular. Ils nums locals e funsils ein scazis culturals e historics da nossas vischnauncas. Aschia fuss ei urgentamein necessari ed opportun sche las vischnauncas dalla Surselva e forsa schizun digl entir Grischun savessen realisar semegliants projects dils nums locals e funsils sco quei ei succediu a Sedrun.

Gregori Maissen, Mustér